



Tir Yimiyim

www.tirymiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymiyim@gmail.com

TAPAK 10 Yangia anidakangma : Tir Yimiyim

tirymiyim@aolima

tir yimiyim

TAPAK 8

ISSF World Cup: Tebur 10m Air Rifle
nung Panwar-i Bronze medal angu

Pakistan PM Imran Khan
dak Covid-19 tashidak putet

VOL. XVIII NO. 156 (ADOK 156) DIMAPUR

AMUNGNÜ (SUNDAY)

METSÜREMI (MARCH) 21, 2021

₹ 5.00

Nagaland nung World Oral Health Day among



Kohima, March 20 (TYO): World Oral Health Day tenüng nung National Oral Health Programme Kohima unit-i hopta ka piyong mapa balala inyaka aruogo.

Iba anogo ya "Be proud of your mouth" omen nung ajemdaker among.

Iba anogomung tenüng nung Dr. Kediphrunuo Shüya, Dr. Mezülüenuo Dzüvichü aser Dr. Kemezhüenuo Shüya nungertemi Govt. Middle School Meriema (Kohima), Govt. High School

Merhülietsa (Kohima) aser Govt. High School, New Market (Kohima) nung Oral Health Awareness indang jembi.

Iba mapang kaketshirtem nem tooth brush agütsü aser school aika nem 'oral health care posters' lema agütsü.

March 20 nü Naga Hospital Authority Kohima nung sentong ka agidang NHAK Managing Director Dr. Thorhusie Katiry-i tajungshi o jembi aser Dr. Kediphrunuo Shüya-i onük jembi.

Mar 27 nungi Apr 3 tsüngda anogo ananü dang bank lapoktsü

New Delhi, March 20 (Agencies): March 27 nungi April 4 tsüngda India nung bank tem anogo ananü dang lapoktsü.

Reserve Bank of India (RBI) bank holiday calendar ajanga ashiba agi, March 27-29 tashi Honibar tanabuba aser Holi benjung ajanga anogo asemnü bank shibangtsü.

March 30 ya sodi anogo ka lir aser iba jagi Patna nungbo bank kongsangtem anogo pezü tashi shibangtsü.

March 31 ya 'official holiday' ka masü saka financial year tembangba anogo asünung customers magizüker.

April 1 ya sodi anogo ka lir aser iba ajanga bank temi annual accounts shibanger.

April 2 nü Good Friday ajuruba ajanga 'non-working day' lir aser iba jagi linük nung bank tem shibangtsü.

Bank sodi anogotem: March :

- # 27 (Last Saturday)
- # 28 (Sunday)
- # 29 (Holi Holiday)
- # 30 (Holiday in Patna branch)
- # 31 (Financial Year-end)
- April:**
- # 1 (Bank closing of accounts)
- # 2 (Good Friday)
- # 3 April (Working Day)
- # 4 April (Sunday)

Ajisüaka, state kar nungbo bank sodi mamonger, anungji sodi anogo balala asütsü akok.

RBI calendar ajanga ashiba agi "linük nung Deobar pezü aser Honibar ana dak alaka Bank tem gazetted holidays nung dang shibangtsü."

RBI indang March 2021 Holiday Calendar ajanga state balala nung March 22, 29 aser 30 anogotem shibangtsü shia lir.

Anungji, bank nung mapa aliba customer temi tan hopta tsüngdasa mapa inyaksü merangtsüla mesüra April 3 sülen ang inyaksü akok.

April ita nungi mozü jenjang 20% talila akümtsü

Guwahati, March 20 (Agencies): April ita nungi India nung painkillers, anti-infective, cardiac aser antibiotics mozütem jenjang atutsü akok.

Annual Wholesale Price Index (WPI) den liromedema mozü jenjang atutsü atema

Centre sorkari temelaba agütsüogo, ta National Pharmaceutical Pricing Authority-i metetdaksü.

Küm ka tsüngda mozü yangluba nung 15-20% timba endokba ajanga pharma industry-i ozü jenjang nung 20% atutsü tebilemba lir.

COVID-19 Nagaland: Hopta ka tashi shinga dak-a meputet

Kohima, March 20 (TYO): Nagaland nung hopta ka tashi nisung shinga dak-a COVID-19 meputet süio.

"Tanü nisung shinga dak COVID-19 meputet aser taneptsü angur-a maliasü" ta Health & Family Welfare Minister, S Pangnyu Phom-i metetdaksü.

"Nisung 12,225 rongnungi 11,978 taneptsü nguogo aser Nagaland nung COVID-19 nungi taneptsü angubaji 97.98% lir" ta Health & Family Welfare Director, Dr Denis Hangsing-i ashi.

COVID-19 puteta alir nisung 91 asüba nungi parnok 10 bo tanga timtem ajanga asü

aser nisung 154 tanga state temi ogo, ta paisa metetdaksü.

Nagaland nung nisung ana anepalubaji Kohima aser Mokochung nung kaka lir, ta Dr Hangsing-isa ashi.

Nagaland nung COVID-19 alitsü akok ta temolung melemi bilemba sample 1,34,822 tendangogo. RT-PCR ajanga 75,321, TrueNat ajanga 37,487 aser Rapid Antigen Test ajanga 21,014 tendang, ta paisa ashi.

Nisung meyrjang 51 temai COVID-19 vaccine agiogo:

Honibar tashi nung Nagaland nung nisung 51,500 tema nem COVID-19 vaccine (Covishield) dose agütsüogo.

Nagaland nung nisung 51,641 nem vaccine dose 67,786 agütsüogo, ta State Immunization Officer, Dr Ritu Thurr-i ashi.

Vaccine agirtemji frontline workers 32,884, healthcare workers 11,534, teintet rogo 5,953 aser arishi küm 45 ser temapur 1,270 lir, ta paisa metetdaksü.

Healthcare workers 7,116 aser frontline workers 9,029-i COVID-19 vaccine dose anaprong agiogo, ta Dr Thurr-isa metetdaksü.

Mozü agirtem rongnung temang nung timtem adokba osang kecha mali, ta paisa shisem.

Assam nung ECI-i Rs 75 crore tashi puogo

Guwahati, March 20 (Agencies): Assam Assembly election mezüngbuba shilem agitsü jakdang ketdangsürtemi Rs 75 crore alangba sen, yi, ozüing alema shibelenba mozü aser sentiosettem puogo.

February 26 nungi March 18, 2021 tashi nung sen Rs. 16.14 crore aser Rs. 19.21 crore alangba yi puogo ta ECI-i metetdaksü.

Maneni, Rs. 2.82 crore alang hon, taribi osettem, Rs. 30.30 crore alang mozü aser Rs 6.63 crore alang cigarettes, black pepper amala sempet agütsütsü abenba puogo ta parnokisa ashi.

February 26 nungi March 18 tashi nung Rs. 75 crore tema apu.

March 7 nü NCB Guwahati Zonal Unit-i Rs. 15.14 crore alang Crystalline Methamphetamine apu.

March 7 aser 8 anogotem DRI-i Rs. 5.99 crore alang Ganja (seret 3682) aser Gold (seret 1) apu. Item ya Manipur aser Tripura nungi bener aruba liasü.

Directorate of Revenue Intelligence (DRI)-isa Dibrugarh district nung March 15 nü Rs. 4.52 crore alang yi litre 37, 569 apu.

February 26 nü assembly election agitsü osang sangoktsüba sülen nungi March 18, 2021 tashi nung yi litre lakh 77 tema yokogo.

Bokajan, Charaideo, Dhemaji, Jorhat, Morigaon,

Sivasagar, Sonitpur aser West Karbi Anglong district 8 nung yi 30 % agi timba yokogo. Iba jagi Excise ketdagsürtemi yi ayokba dokantem anogoshia mita reprangdar aser show cause notice agütsüogo.

Tawa tu Gossaigaon nung IMFL dokan ana excise dak sendakba ozüngtem nung ajemdaker shibangtsüogo. Excise rules alema inyakba atema nisung 224 puogo aser gari 16 pua lir.

Ozüing alema yi shibelenba mita anüktsü atema Inter-District Border nung excise ketdangsürtemi check-gates 15 lapoka lir.

Yakünü tashi nung Rs. 30.30 crore alang ozüingi memelaba mozütem puogo.

Nagaland sorkari COVID-19 azüoktsü atema SOP tasen latettsür

Dimapur, March 20 (TYO): Nagaland nung COVID-19 azüoktsü atema Chief Secretary-i Standard Operating Procedure (SOP) aser Guidelines metetdaksüogo.

Iba tetuyuba nung exhibitions, trade fairs, fairs aser swimming pools lapoktsü melar saka SOP sülen anidaktsüla ta shia lir.

COVID-19 indang SOP sülen anidaka theatre, multiplex aser cinema hall 100% lapoktsü akok ta Chief Seceretry-i ashi.

Containment zone nung

madenba tesemtem (kilung nung) nung lokti, sobaliba, shisaliok, saisapong, yimten aser tamangba yimsü sentongtem 100% lapoktsü akok. Sentongji kima nung agitsüba süra tasazük yari nisung adenshitsü akok.

Iba amala sentongtem nung face mask enoktsüla, nisung o nisung tsüngda tepila ayutsü, thermal screening asütsü aser hand wash mesüra sanitizer amshitsüla, ta Nagaland Chief Secretary-isa metetdaksüogo.

SOP nungsa venue

providers, organisers, service providers, exhibitors, visitors aser business delegates-i inyaksü latetja lir.

Arishi küm 65 ser temapur, temang nung tashidak alirtem, mashisa tetsürtem aser arishi küm 10 teküpok tanurtembo nüngdak balaka melira kidang dang among tajungba ta SOP nung shia lir.

"SOP sülen manidakertem dak ozüingi melaba ama temerenshi alitsü" ta Chief Secretary-i metetdaksüogo.

CBI-i state 25 nung ochimashi maparen ladanga ao

New Delhi, March 20 (Agencies): Central Bureau of Investigation (CBI)-i Hokolbarnü State aser Union Territory 25 tema nung ochimashiba maparen inyakba ladanga ao.

Centre sorkar department aser telok 30 nung CBI-i iba 'special drive' inyakogo.

"India sorkar indang mapa

mesüra mapatongtem inyakba nung ochimashi maparen melaba inyaksüsa aliba tesemtem nung onoki ajungbena mita ao" ta CBI Spokesperson RC Joshi-i ashi.

Hokolbarnü mita aoba yimti aser jilatem nung Cachar (Assam), Badarpur, Shillong (Meghalaya), Agartala (Tripura), Tezpur & Guwahati

(Assam), Imphal (Manipur), Port Blair, Itarsi, Agra, Singrauli, Goa, Meerut, Allahabad aser Gorakhpur dena lir.

CBI-i mita aoba Department temji Food Corporation of India, Railways, BSNL, GST, Postal Department, CSD Godown, North Coal Fields Ltd, Indian Oil Corporation, CPWD aser Military Engineering Service liasü.

Mokokchung nung World Oral Health day mungogo



Dimapur, Metsüremi/March 20 (TYO): "BE PROUD OF YOUR MOUTH" omen nung ajemdaker National Health Oral Programme (NHOP) Mokokchung unit-i ayongzüka World Oral Health day mungogo. Iba sentong ya March 20 nü CMO Office conference hall nung agia liasü.

CMO office sangdong ka ajanga ashiba agi, sentong nung o jembiba mapang Dr. Kibangkumba, Dy. CMO-i nisung ka health nung oral health ya tongtiban shilem ka

lir ta ashi. Paisa, oral health indang tangazükba agütsütsü aser oral hygiene koda tongtiban aser tashidak balala nungi jenboa alitsü atema jenangtem indang lemsatop. Lendong nungi jenboa alitsü atema yimya tamajung nungi pilaa alitsü asoshi pai sentong nung shilem agirtem ayongzüka.

Iba sentong ya Dr. Sentirenla jamiir, Jr. Dental Surgeon lenisüba kübok agi, kong lai world health day ayongzüka amungba indang tongtiban onüktem aser oral health dak sendakba nung

tangazükba agütsütsü asoshi nükjidong aliba indang lemsatop.

Sentong ayongertemi iba anogo school balala nungi painting tetoktepba ka ayongzüka agi aser takoker nem senpet aser kuli kakat agüja liasü. Painting tetoktepba nung tetendangertemi ALLEN MARK Artist aser Dr. Keneitheja, Jr. Dental surgeon liasü. Maneni District Education Officer Limasangba-i takok angurtem nem sempet agütsü.

27 Mkg Town Mandal indang BJP Mahila Morcha ajanga sangdonger

Dimapur, Metsüremi/March 20 (TYO): BJP Nagaland state unit indang party inyakyim nung mangatetep adoka aliba dak sendakba nung 27 Mokokchung Town Mandal indang BJP Mahila aser party executive temi iba sangdong ya agütsütsüsa akumer, kechiaser iba mangatetep ya ajanga party ajunga inyakyim nungi teküboktiba jenjang, talisa BJP 27 Mokokchung Town Mandal tashinung kongshir, ta Tamsunaro Pongen, President, Mahila Morcha, 27 Mokokchung Town Mandal; Imnajungla, General Secretary; Chubanungla, Secretary; Benjongsangla, Secretary; Sashililia Mollier, President, Mahila Morcha; Tekatemjen, Executive Member, 27 Mokokchung Town Mandal; Tinuakum, Executive member; Tamsunaro Pongen, President, Mahila Morcha aser Tekatemjen, Executive member, 27 Mokokchung Town Mandal nungertemi sangdong ka ajanga ashi.

27 Mokokchung Town Mandal executive nung mendenpur aser executive züngsem 19 ajanga BJP

Mokokchung district office dangi December 26, 2020 nü shidi ka nung Mandal president Tiakumzuk Tzudir tekeratiba nung anenjang, ta takhangba agüja liasü, kechiaser pai party inyakyim ketdangsüba nung timtem kar ajangshia liasü, ta sangdong ajanga ashi.

Ajisüaka onoki akhangba ama tang tashi mera kecha magi aser onokbo tesüiba ita asem tashi BJP Mokokchung District nungi tajungtiba nung obendang agütsütsü atatepa arur.

Tia maka BJP Mokokchung District ajanga Mandal ken o ya metembangteter ta ajiteter, kechiaser tang BJP Nagaland state nung lenir inyaksü atema ken o atsütepba mapang lir, kong state party lenir timbai Temjen Imna Along Longkumer ya state tir menden nungi agienang, ta akhanger.

Anungji BJP 27 Mokokchung Town Mandal indang party timtem ya state level nung lenir inyaksü atema ken o atsütepba indang mesangzüka aruba ka dang lir.

Nagaland state nung BJP, talisa Mokokchung district aser Town Mandal ya yanglutetsü mesüra raksatsü tensa ka nung

lir, koba agi tarutsü nung Nagaland state nung asen party tashi sayutsü, ta parnoki sangdong nung shia lir.

Iba dak sendakba nung 2023 nung state assembly election agitsü lir, ta asenoki süoki ia angatetsüla aser tang party telungzüka nung mangatetep adoka aliba pentetratetsü mapang masü saka State nungi tenzüka district aser Mandal tashinung BJP ajanga taruba election atema maparen tenzüka inyakba mapang ka asütsüla, ta ashi.

Iba khuret ya tekeratiba nung mepentetra, Town Mandal nung küm aika BJP karyakartas ama tashiba angaa inyaka arubatem amajok akumtsü. Tekeratiba nung iba mangatetep ya meyanglutetra, taruba election nung BJP teloki menden ka nung takok angutsüa tamakoktsü asütsü, ta parnoki ashi.

Anungji, onoki tatsü talang ajak asadanga jembiba sülen aser BJP 27 Mokokchung Town Mandal ajungtsü atema BJP Nagaland State President ken o nung onoki BJP Mokokchung District ketdangsür trok onoki akhang akhang nungiter, ta sangdong ajanga ashi.

Noklak nung khien dang amshiba plastic oset nokdang

Dimapur, Metsüremi/March 20 (TYO): SDO(C) & Administrator, Noklak Town Council, C. Phuniang-i sangdong ka ajanga, Noklak district nung khien dang amshiba Plastic osettem ajak nokdangba metetdaksüogo. Plastic ajanga timtem bener arutsüba agintsü aser plastic oset kanga amshiba ajanga tzümopung nung timtem tulu adokdaksüba nokdangtsü nükjidong nung iba osang agütsüogo.

District nung teküboklen agüja aliba plastic osettem khenyongi amshitsü memelatsü:

(a)Tasazük kecha makai tai aketba, maketba plastic yangku ajak (b)Auso, marok, loli, stirrers amala plastic cutlery ajak (c) Styrofoam (thermocool) agi yangluba cutlery aser decorative tem ajak (d) Polythene. (e) Nylon (f) Poly-Vinyl Chlorides (P.V.C) (g) Poly-Propylene, and (h) Poly-Styrene.

Paisa, khien dang amshiba plastic osettem koba dang disposable plastics ta ajar, item osettem ya plastics packaging nung kanga bulua amshir aser item osettem ya recycle aser mintok tsüngda khien dang

amshir. Item osettem rongnung yangku, chiyongtsü alepa amshiba, bottles, loli, pongdang, marok aser cutlery densema lir, ta ashi.

Maneni iba tetuyuba sülen kija, lokti, institutions/ commercial establishment (educational institutions, office, hotel, shop, restaurant, religious institution, industrial establishment, banquet hall amala) ajak ajaki tashi angaa anidaksüla aser tetuyuba sülen manidakertem nem temzüng ozüng kübok tapet temerenshi agütsütsü, ta metetdaksüogo.

Kezo jila nung merekmeju sentong ayonga agi

Dimapur, Metsüremi/March 20 (TYO): HQ IGAR (North) tawabangba kübok Assam Rifles Kohima Battalion-i, Chakabama ansa aliba Cimorb Public School nungi kaketshirtem den longjemer Kohima District kübok Kezo jila nung March 19 nü merekmejung sentong ka ayongzüka agiogo.

Iba sentong nung school nungi kaketshir 44 aser tesayur 7-i jangrabangra shilem agia liasü. School tanurtemi school telung aser temeket kanga pelatepba merekmejuba tajangshiba tajung ajangshio. Iba sentong ajanga asen meketa aliba tesemtem merekmejua ayutsü atema tanurtem nem tangazükba agütsüogo.

AR-i Longmatre nung medical teyari agütsü

Dimapur, Metsüremi/March 20 (TYO): HQ IGAR (North) kübok Assam Rifles Kiphire Battalion-i, March 19 nü Kiphire District kübok Longmatre tesem anasa gari tsükokba lendong ka nung kanga mejungi yirur aliba gari anisangnem medical teyari

agüja liasü.

Arishi küm 24 tain tata gari anir Shaha Ali, pai aniba gari NH202 nung tsükok. Gari anisang ya tekolak yirur COB-i anir aru. COB nung BFNA-i pa nem takaratiba nung tenüngdakba teyari balala agüja liasü.

Security Forces-i tenokdangba oset apu

Dimapur, Metsüremi/March 20 (TYO): Police den longjemer Security Force temi Dimapur District kübok Petrol Pump ka anasa March 18 nü tenokdangba oset apu.

Osang tejangja ka angazükba sülen Security Forces aser State Police na longjemer iba tesem meita ao aser Burma Teak 5000 CFT (Approx Rs 1.4 Crore), gari ti, sen 17,500/- aser Mobile Phone 11 apu

Shibelener den parnoki apuba osettem ajak maneni bushitsüngdangtsü atema Chumukedima Forest Range, Dimapur Division nem bendanga agütsüogo.

Kohima nung telungpur ka apu



Dimapur, Metsüremi/March 20 (TYO): Police den senteper Security Forces temi March 16, 2021 nü Kohima jila kübok PWD Colony anasa Nikki Sumi Faction nungi telungpur ka puogo.

Itangitertem nungi osang angazükba sülen State Police aser Security Forces nati iba tesem meita ao aser Nikki Sumi

Faction nungi telungpur ka apu. Pa ket nungi 7.65mm Pistol ka den magazine, 7.65mm injang pongu, 7.62mm AK-47 injang 14 aser 5.56mm injang pongu apu.

Aija alisang den pa ket nungi apuba prangbong injangtem South Police Station, Kohima nem bendanga agütsüogo aser ken o maneni bushitsüngdangtsü.



March 20, 2021 nü Guahati High Court Judge, Justice S. Hukato Swu-i Aongza Ward nung Mokokchung Judicial Officer Quarter ki lapoktsüba mapang tangokba noksa nung angur. Iba quarter ya Centrally Sponsored Scheme (CSS) kübok sen lakh 407 intoka asü. Mokokchung, March 20, 2021



Guwahati nung All Assam Student Union (AASU) züngsemtemi Citizenship Amendment Act (CAA) anema bike rally ka nung shilem agiba angur. (Guwahati, March 20)

Mizoram CM-i ECI dang by-election anogo melenshitsü mepir

Aizawl, March 20 (Agencies): Mizoram chief minister Zoramthanga-i Election Commission of India (ECI) dang Serchhip assembly by-election anogo melenshitsü tema shidi züluogo.

Yaküm November ita MLA Lalduhoma anti-defection law kübok disqualify asüba agi Serchhip menden tazüing aküm.

CM Zoramthanga-i ECI dang April 17 mesüi April 16 nü polling asütsü atema ayongzükogo.

April 17 ji Honibar aser ibaji

Mizoram nung Seventh Day Adventist Church indang Sabbath anogo lir, ta pai ashi.

Mizoram nung Serchhip assembly constituency nung alirtem dena Seventh Day Adventist Church züngsem aika lir aser April 17 nü polling asüba ajanga arogo züngsem karibo vote meinoktsütsüsa akümtsü ta Zoramthanga-isa metetdaksü.

"Polling anogo ka jelia April 16 nü agitsü atema mepishir" ta pai ECI dang ashi.

Zoramthanga-isa ECI dang May 2 (Deobar) nü counting

anogo melenshitsü ayongzükogo.

Brihostibarnü Seventh Day Adventist Church indang Mizo Conference aser Serchhip Thalai Pawl (Serchhip Youth Club) teloktemia polling aser counting anogotem melenshitsü shidi züluogo.

Maneni, Mizoram nung opposition party tongtiba Zoram People's Movement (ZPM) aser state BJP-ia ECI dang Serchhip assembly by-election aser vote azüngba anogo melenshitsü shiogo.

Arunachal MP Gao-i Indo-Myanmar arrtsü atsü dangtsü akhanger

Itanagar, March 20 (Agencies): Arunachal East constituency nungi Lok Sabha züngsem Tapir Gao-i India-Myanmar arrtsü atsü dangtsü atema takhangba agütsüogo.

"Ozüng alema arurtem noktangtsü atema asenoki Indo-Myanmar arrtsü atsü dangtsüla" ta MP Gao-i ashi.

Myanmar nung mitkartemi sorkar atsü dangdokba anema nübortem lungkak aitba mapang tiyalong ka nung Gao-i iba takhangba agütsüogo.

Ministry of Home Affairs

(MHA)-i Myanmar den arrtsü tepa aliba Arunachal Pradesh, Mizoram, Manipur aser Nagaland state tem dang kümdanga alitsü osang sangoktsüogo.

BJP MP Gao-isa taoba mapang Parliament nung Myanmar nungi özüng alema aruba indang tebilemtsü lemsatepogo aser iba mapangjia pai India-Myanmar arrtsü atsü dangtsü jembia liasü.

Myanmar nungi Rohingya nungertem özüng alema India-i aruogo aser tesem balala nung

lidar. International border nung atsü maliba ajanga hon, mozü, prangpong aser injangtem shibelener, ta Gao-i ashi.

"India-Myanmar arrtsü matsü dang tashi iba khuret teti alitsü" ta Gao-i Parliament nung metetdaksü.

"Myanmar nung mitkartemi sorkar atsü dang agiba atema India sorkari mapa inyaktsüla. Iba ya China-i tasa atonga inyakba lir" ta paisa ashi.

Arunachal Pradesh-i Myanmar den kilometer 440 arrtsü tepa lir.

Manipur nung tayimtsü ajanga arurtem dak Covid-19 tendangtsü

Imphal, March 20 (Agencies): Linük kübok tesem kar nung COVID-19 kanga prokshiba nung ajemdaker Manipur sorkari state 8 nungi tayimtsü ajanga arurtem RT-PCR test agitsü telemtetba agiogo.

State 8 ji Maharashtra, Kerala, Chhattisgarh, Madhya Pradesh, Gujarat, Punjab, Rajasthan aser Haryana lir, ta Health department

"Imphal Airport nung

passenger tem sample agizükba sülen yoktsü aser iba report mangu tashi parnok home/self-isolation nung alitsü" ta State Health Services Director, K Rajo Singh-i ashi.

Yaküm December 18 nungi Manipur nung air passengers dak COVID-19 tests anena liasü.

Manipur nung nisung 29,326 dak COVID-19 aliba putet aser parnok 28,929 taneptsü nguogo. Tang nisung 24 anepaludar.

Bangladesh nunger nashi shibelener ka apu



Agartala, March 20 (Agencies): Honibarnü Border Security Force (BSF) jawan temi North Tripura district kübok Yaqubnagar nung nashi shibelener ka khasetogo.

Iba nisungji Bappa Mia ta jangjaogo aser pa ya Bangladesh kübok Batuli nunger liasü. Indo-Bangla international arrtsü nung pa khaset.

Honibarnep nisung telok kati nashi shibelentsü atema border fencing rangdang. Idangji BSF 166 battalion jawan temi parnok ngur aputsü merang ta osang angazüker.

BSF jawan tem nashi

shibelener tem dangi aodang parnoki meyiper amak. Idangji sepaitemi injang khaloktsüdag Mia khaset.

India aser Bangladesh nunger nashi shibelener temi BSF jawan tem amak aser iba jagi jawan temi meyiper injang khaloktsü, ta DIG Rajeev Dua-i metetdaksü.

Yaqubnagar nung aliba international border nung nashi kanga shibelener ta iba tesem nung alirtemi ashir.

Bangladesh nungi aser ano India nung alirtemi mapang shia yimdaklirtem indang nashi auyar Bangladesh-i bener aoer.

Tripura nung yimdaklirtemi train lenmang mokdang lungkak ait

Dharmanagar, March 20 (Agencies): North Tripura kübok Chandraharam Para nung Rothabil nung alirtemi railway lenmang mokdang lungkak ait.

Panisagar sub-division kübok Chandra Halam Para yimtsü nung railway level crossing, overbridge aser underpass ka yangluang ta takhangba agüja parnoki

lungkak ait.

Parnoki railway ketdangsürtem nem memorandum ka agütsüogo aser ibaji mezüing nungbo agizük. Ajisüaka ketdangsürtemi iba lenmang ya özüngi memelar ta ashi aser mapa inyakba ajak anen.

Lenmang yangluba anenba atema tejashi nung yimdaklirtemi railway lenmang mokdang lungkak ait.

Manipur nung RIMS kaketshir asüba bushisü dangtsü akhanger

Imphal, March 20 (Agencies): Imphal East district nung kaketshirtem aser iba tesem nung alir nisung aikati Regional Institute of Medical Sciences (RIMS) indang hostel nung kaketshir ka asüba atema bushisü dang asütsü takhangba agütsüogo.

March 15 nü RIMS indang hostel takdang nung MBBS 5th-semester kaketshir Sanaton Athokpam (22) taitüsü keta sür aliba angu.

Pa teka anaprang alener liasü aser pa mang nung zübo aika keta liasü. Par kinungertemi state sorkar dang bushisü dang asütsü rongshia arur.

CBI ama independent agency ka nem bushisü dang südaksütsüla ta kaketshirtemi takhangba agütsü.

Tanü lungkak aitba ajanga Imphal East district nung shishilembadak tulutiba Lamlong Bazar nung timtem ajuruogo kechiyong shishilembartem aser dokan kiburtemi lungkak aitba nung shilem agi.

"March 16 nü kaketshir indang tasü mang nung post-mortem agiaka, tanü tashi pa asüba kuli magütsür" ta 'Justice for Sanaton Athokpam' convener Moirangthem Loyalakpa-i osangbener dang ashi.



Congress candidate Santanu Sarmah-i Assam Assembly election atema Nagaon district nung door to door campaign agiba angur. (Nagaon, March 20)



TIR YIMYIM YIMOBILEM (EDITORIAL)

DIMAPUR AMUNGNÜ, METSÜREMI (MARCH) 21, 2021

KECHIBA NAI DANG INYAKER ?

Nisungi pa yanglusang Tsüngrem peladaktsüsbaji mazüngi mapa inyakba ya ka lir, kechiyong alima nung kecha meinyak ayongayonga chiajema alitsüsbaji Tsüngremi mulungba sentong masü, anungji mapa mazüngi inyakba ya Tsüngremi ashi angaba mapa ka lir. Iba jagi kodangsa asenoki asen nüngdak dang masü saka tangar timtemba aser nüngdaktem reprangtetdir, asenoki item ajakji yariner, anungji nisungtem ajak yarinüdag mapang aser rongsen agia meperir aser nisung ajakbo temulung süa meyaritetter. Anungji asenoki bilemdangtsüba kaji, asenoki anguba wadang ajakji Tsüngremi asen kija inyaktsü asoshi agütsüba wadang masütsü. Aji oda, asenok aikati Tsüngrem peladaktsütsü bilema nisungtem asen tashi dak alaka yaribaji, ashiko, Tsüngremi asen nem nungloktsüba mapa masütsüa akok. Kasaji, pei nübortem dang yarinüba temeim shisatsü dener, Mosai akok tashi nisung ajak ajurua yaritsü merangba otsü ka asenoki Anitet 18 nung shia angur. Israel nunger alarsa alirtem to tangbo Egypt nunger kübok alar tia nungi temerem tzüim ajangdanga arur külen arem nung parnoksa alitsü tenzüker. Kibur ka kübok alarsa alidangbo parnok rongnung mangatetep adoktsü lenmang mali asü, kechiyong parnok taküm nung parnok kibur masü saka tangbo alar talenba nung sala nungji Israel nungertem rongnung pei pei temeten bushitsü tenzü, idangji anogo shia parnok rongnung ken o angadanger külen obendang agütsüsbaji Mosa dang liasü. Israel nunger asoshi iba mapangba ya Tsüngremi parnok nem lemzüksüba tenangzükbba limaji tekaraba nung atongtsü asoshi sarasadema sentong yanglutsü melen, anogo shia parnok o parnok na Mosa tsüngdang o katepa amongba mapang tamajung ka liasü. Aji oda, Israel nungertem rongnung meputep adokba ken o onsara nungji, anogo shia anepdang nungi nikongdang tashi nunga Mosai nisungtem ken o ji mangama aser mebendangtsüma. Ibaji Mosa asoshi dang masü saka ken o bener arur nübortem asoshia timtem tulu liasü, kechiyong nisung aika anepdang nungi nikongdang tashi Mosa meketa nokdak saka mapang agi meperiba agi ken o mangadangteti kidangi meyipa oli asü. Nübortem anir tenangzükbba lima atongtsüba mapajibo yutsü, Mosa asoshi parnok nübortem rongnung meputep adokba ken o bendangtsüsbaji tangtibangba aküm. Idangji pai par kibonga mereprangtet aser pa asoshi anibelem tulu liasü. Mosaiبو temulung ajak agi Tsüngrem peladaktsütsü asoshi pa kinungtsü aser tanurtema toko'er kidang yutsü, anogo shia anepdang nungi aonung tashi pa kisüng Israel madak obendanger kümer tanitebelema mesasai inyak. Ajisüaka, ibaji kodang Mosa toko Jethroi angur, tanüki inyakba mapaji Tsüngremi pa nem nungloktsüba mapa dang nungi tali bendenloka inyaker ta pai reprangtet. Anungji, Jethroi tanük Mosa dang, Israel nungertem rongnung tilateri ken o ajak nü kijai mebendangmatsü aser aji nü mapaa masü, kechiba itemji nai dang inyaker ? Anungji nü kübok nübortem ken o angadanga bendangtsü asoshi teindang nisung meyi, noklang, tenem aser ter madak shimang ta ashiba asenoki kasa tapu nung angur. Ibaji angaa kodang Mosai pa kübok tanishirtem shim, idangji dang nübortema mapang shitak nung obendang shitak angur aser Mosa-a Tsüngrem den jembitsü mapang peria agitet. Asenoka Mosa amaji, asen kidang aser asen mapa inyakdak, mapa ajakji asen meiyong kümer asen aseni dang inyaktsü merangba ajanga anogo shia chiyongtsü mapanga mangu belemer aser mapabo matemer ta inyaka alitsüa akok. Ashiko, ibaji asenoki tangar dak temulung malemba agi asütsüa akok mesüra aseni asensasa kanga khuretsa bilemba agi asütsüa akok. Ajisüaka, kodang asenoki inyakba mapatem agi asen temang aser temulung raksatsüsa mesüra asen mapang agi meperitsüsa atalokbatem asenoki reprangtetdir, item ajakjibo Tsüngremi asen nem nungloktsüba mapa aser wadangtem masütsüa akok ta asenoki bilemdangtsüla. Tsüngremi kodanga asen tashi agi matutsüsa aser mapang agi meperitsüsa mapa melemzüksütsü, anungji kodangsa aseni inyaktsü amai mapa aika kümdir, asen kidang asütsüa akok mesüra yimten, arogo aser lokti nung asütsüa akok, asenoki asen kinunger, medemer aser nübortem rongnung mapa lemsaa inyaktsüsbaji tongtibang ta metettsüla. Lenir ka mapaji mapa ajak peisasa dang inyaktsüsbaji masü saka pei den külem alirtem den mapa telemsa shia lemsaa inyakdaksütsüsbaji lir. Asenoki ibaji mangateti, aseni anguba mapa ajak aseni dang inyaktsü merangra, ashiko shitakba asen nem lemzüksüba mapabo meinyakjungi asen mapang temadoktsüa akok. Mosaiبو toko Jethroi ashibaji mangai pai pai dang Israel nunger ken o ajak angadanga bendangtsü merang asübo, ashiko, pai Sinai tenemjia metongtetla. Ajisüaka, tokoi ashiba angaa pai Israel nungertem rongnung tanishir shimteta khuret nungloktsüba agi, Israel nungertem rongnung obendang mapang shitak nung anguba dang masü saka parnok rongnung Mosa melentsüsa adok. Tanüa asen kibong aser asen lokti, yimten aser arogo nungi tanishir tajung adokdaksünüra, pei kijai dang inyaktsü memerangi tsürabur aser tanishirtemi mapa lemsaa inyak metettsüla. Iba jagiang Tsüngrem sentong ajak ataloka inyaktettsü.

OLEMSABANG

TENSA DEN PETA CHUBATEM KAKET AZÜNGBA

~ Dr. Temsüyanger, CTC, Aolijen

(Yashi adok nungi...)

Tensa den apet Laishiba azüngba ajanga kechi tajangzüak agütsür?

1. Ibai ajanga loktiliba nung tensaden apet Laishiba azüngtsü leman lapoktsür aser temulungtetba kadaktsür. Pei tensa angateta Lai azüngbaji kanga dang tongtibang, kechiaser Laishibaji aseni taoba putu tensa nung dang azünger masü saka asen tensa asoshi azünger. Laishiba ajanga Tsüngremi meimchir lokti balala shia par den apet jembir. Anungji aseni-a asen tia meteta, aser tensa nung Tsüngremer Oji angatettsüla. Aseni asen tensa aser tia memetetra Tsüngremer Oji asen tensa den apet mebushitettsü.
2. Lokti nung tangar den Laishiba azüngtsü temulungtetba alitsüla Iba ya aliba ajanga lokti (community) nung tangar ka dang nungi angazüktsü, aser iba den külem-i, aseni metetba tangar den lemsateptettsü leman lapoktsür. Iba mapa nung laishir (trained readers) aser tangar (untrained readers) anaprongla kanga tongtibang, aser ajaki shilem agitsüla.
3. Laishiba arok aroka azüngtsü temulungtetba alitsüla Laishiba arok aroka azüngtsüsbaji lokti tangatetba asütsüla. Laishiba arok aroka angateta, leman tasen balala ngua, asen den apet azüngtsüsbaji asen nükjiong asütsüla.
4. Tensa den Laishiba azüngba ajanga pei taküm aser lokti taküm melenshitsü asoshi temulungtetba alitsüla

Laishiba aroka azüngtsüsbaji kanga tongtibang, tanabuba nung asen tensa jangja jangja metetsüsbaji kanga tongtibang. Kodang Lai züluba tensa aser asen tensa tali metetdir, idangji, iba tensa ana koda balala aser koda kasa, aji tali jangjatsür. Aser iba lima ana aser tangatetba ana ajurutepeba ajanga tangatetba tasen aser temelenshi tasen adokdaksür. Ibaji Laishiba azünger nükjiong asütsüla. Kar asoshi Laishiba azüngbaji kija temelenshi asütsü akok, mesüra kar asoshi lokti temelenshi asütsü akok. Tensa den apet Laishiba azüngbaji anaprongla nükjiongji asütsüla. Lokti temelenshi süra - yimsüsbba, sobaliba, aser tamangba nung temelenshi asütsü.

Lai Azüngba Lemangtem

Lai ya leman asemsü ajanga azüngtsü akok. Seminary nung azüngertemi Laishiba azüngba yimya aika angazüker. Saka item leman asem ajanga Laishiba azüngbayim ajakji rajemtsütsü akok.

1. Tapak tesülen nungi azüngba (Reading behind the text). Tapak tesülen nungi azüngba ajanga, Laishiba tapak otsü (history), loktiliba (society) kobala ka nungi tezülur jagi zülü? Shibai zülü? Kechiba zülü? itemji ratettsür.
2. Tapak nungi azüngba (Reading the text) Iba leman ajanga azüngba agi tapak jagi kechi ashir aser tangatetba agütsür, ibaji tongtibangsa rajemtsür.
3. Tapak tejaklen nungi azüngba (Reading in front of the text) Iba ama Lai azüngba nung, Lai nükjiongtem (themes), temaitsütem (symbols), aser tansütsütem (metaphors) dak ajemdaker azüngtsü meranger. Item temaitsütem, tansütsütem aser nükjiongtem dak ajemdaker azüngba ajanga tasen Lai ajungaji aroka azüngtsü akoker, aser tensa den tapet azüngtsü akoker.

Kaket - Reading in Context: 1 Kings 1-11 in a Contemporary Tribal World Iba kaket nung ni sociological method amshia Solomon mapang, par yimden-yimli, rongsensüba, sobaliba, aser inyakyim balala bushitsü merangdanga lir. Ashi ama, sociological method amshia azüngba asü nung ibai Laishiba tapak tesülen nungi azüngba aser azüngyim ka lir. Kaket nung shia aliba tongtibang nükjiongtem kar dang lemsateptsü. Tapu ka nung Socio-Scientific method ya kechi? Koda iba method, talisa Tejen Lai bushiba nung amshia lir, item indang shia angutsü.

Tapu ana nung Socio-Scientific method amshia I Chubatem 1-11 nung tapaktem kar agiteta azüngba angutsü. Yangi tongtibang nükjiongtem kar dang lemsateptsü. Tapu asem nung, Naga nunger tanü tensa nung timtem aser tebilemstü ajurubatem kar ajitettsü merangba angutsü. Asenoki Naga nungertem tanü jenjang, aser aseni ajangshibatem kechi, aikati meteta rajema alinung, ni balaka melemsar. Maneni, tapu pezü nung, 1 Chubatem 1-11 aser Naga nunger tanü tensa medemdanga, tangazüktsü kar shia angutsü, aser Naga nunger Khristan aser arogo asoshi tanü tensa nung tenyaba tutuyuba kar shia angutsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jharkhand nung Khristan 181 akhi Sarna yimsü dangi meyip



Tawa Jharkhand nung Garhwa district kübok yimtsüng ka nung Khristanem akhi tribal yimsü dangi meyipba mapang tangokba noksa nung angur. Garhwa district kübok yimtsüng aika nung Khristan 181 tashi tribal yimsü dangi meyipogo.

March 20, 2021: Tawa Jharkhand nung Garhwa district kübok yimtsüng balala nungi Khristan 181 tashi akhi tribal yimsü- Sarna dangi meyipogo; par tetsü-tebou nungertemi küm aika tejaklen Khristan yimsü agizüka liasü.

Sarna yimsü dangi meyipba sentong agitsü atema Dharma Jagran aser Tribal Suraksha Manch-i Saraedih yimdak Tribal Conference ayongzüka liasü, aser iba sentong nungji akhi tribal yimsü dangi meyipner Khristantemi sobaliba benshia tetsüng shidokdakja liasü.

Akhi yimsü dangi tanaben meyipertemji Vishrampur Goraiyabkhar yimdak kibong 18 nungi züngsem 104, Khunti Tola Karachali yimdak kibong 7

nungi züngsem 42 aser Mahangai yimdak kibong 8 nungi züngsem 35 liasü.

Süng-long tsüngrem dang sarasadema iba sentong tenzüik aser tribal Khristanem tanaben agizüka tetsürtemi ken ka aten. Tribal yimsü tanaben agizüker ajak tetsüng shidokja liasü.

Parnoki ashiba agi, akhidang Khristan missionary temi mesüzüka tribal nisungtem nem Khristan yimsü agizükdakja liasü.

Sarna yimsü dangi tanaben meyipertemi, tamalen Khristan missionary temi mesüzükba ajanga tetsü-tebou nungertemi Khristan yimsü agizüka liasü, ajisüaka tesülenbo parnoki Khristan yimsü agizükbaji tai ta

ratetogo, ta metetdaksü. Iba sentong nungji All India Vanvasi Kalyan Ashram Vice President Satyendra, State Convenor of Tribal Safety Forum Sandeep Uranv, Deputy state convenor Devanandan, Sarna Committee Ranchi President, Megha Uranv aser Dharm Jagran tongti, Shivamurthy nungera dena liasü. Megha Uranv-i ashiba agi, iba region nung Khristan sayutsüngirtemi kanga sensakertem mesüzüka Khristan yimsü agizükdaksü. Laisa, mashi-memetet tribal nisungtemi meshisadangi tamangba yimsü tasenji agizük, saka tesülen ang missionary tem nem parnok ashiodkaksü ta angatet, ta metetdaksü

Covid wara mapang nung ICC-i Myanmar nung pastor 84 yari

Washington D.C, March 20, 2021 (Agencies): Coronavirus wara mapang nung International Christian Concern (ICC)-i Myanmar linük nung pastor 84 yariogo. Myanmar nung aliba Arogotem aikati pastor tem nem itasen tila agütsür (India nunger sen 2800-3500), ibayongji pastor temi kibok semdangba mapang mesüra sarasadema senzüba mapang nung karibo parnok nem tenla agütsür.

Talisa Baptist Arogotem nung pastor tem nem itasen tajemba agütsür, ibayongji kidang chiyungtsü-a peria maliteter. Iba ama tensa ka nung ano coronavirus wara prokba ajanga Tenla kitem ita 10 tashi shibang aser sen tarulen maliasü.

Myanmar Baptist Churches Union (MBCU)-ibo pastor aser missionary tem indang itasen shilem 50 tashi ajema kümtsü, mesüra itasen magii tenzükan ta metetdakja liasü.

Itasen ajemtsüba ajanga Tsüngrem tenzükertem aika kanga timtemba mapang nung

ICC-i parnok yaritsü apitet. ICC-i Myanmar Baptist Churches Union kübok inyaker pastor 84 nem COVID-19 emergency teyari agütsü; pastor tem ya Myanmar linük tesem ajaklen prokshia lir.

December 19, 2020 nungi tenzüka ICC-i Myanmar nung Tsüngrem tenzükertem nem teyari agütsü aser Khristmas anogo nunga chiyungtsü lemja liasü.

ICC dang pelaba lemsatepdang Sayama Aye Min Soe-i, "Onok timtemba indang ni meshiner, kechiyong onok dang masü saka nisung ajaki timtem ajurur. Ajisüaka benjung mapang onok nem sempet agütsüba atema ni Tsüngrem aser ICC dang kanga pelar. Item teyari ajak ya America nungi arubaji tesüngmangtsüka lir. Nenok ajak dang kanga pelar; Tsüngremi nenok ajak moajang," ta metetdaksü.

MBCU nungisa Saya Zin Ko Chit-ia, "Ni kanga pelar, aser ni kechi lemsateptsüar ni merateter. Ni teyari nüngdaka

MBCU nem kü tenüng agütsü. Parnoki yaritsü ta ni amanga liasü. Ajisüaka atangji teyari angudang ni ajak dang pelaba lemsatep. Nenok dang kanga pelar; Tsüngremi nenok ajak moajang ta sarasademtsür," ta lemsatep.

Yaküm September ita nunga ICC-i MBCU Bagu mission aser city mission kübok pastor 53 nem teyari agüja liasü.

Myanmar nung nisung 142,000 tema dang coronavirus tashidak putetogo, iba tashidak agi nisung 3,000 dak tema süogo aser nisung 130,000 dak tema anepogo.

UN World Food Programme-i Myanmar nung rongsenkettsüng timtem tulu ajurutsü ta metetdaksüogo. February 1 nü sepaitemi Myanmar lenirtem apuba sülen sepaitem yimsüsü tenzüka anema nüburtemi anogo aika longkak aita arudar. Tang linük nung covid wara aliba den külemi yimtenren tensa mejungi lia linük nung totzü aser chiyungtsü jenjang kanga atuba ajanga nüburtem kanga timtemtepdar.

ANOGO ABEN TSÜNGREM DEN

TARAK NUNG OSANG TAJUNG

"Idangji pai Toma dang ashi, yangi ne temeyong asenokang aser kü tekabu ajiang....." (Yohan 20:27)
Asenok temang nung teyiruba ajanga tarak mesüra zübu lira asenoki kanga animesüngzüki bilemer aser aji nembangtsü meranger. Kari süoshi agi mesüra kar makeup ajanga nembangtsü meranger. Saka karibo item tarakji odi odia dang kecha menembangi dang sadok sadoka senzüteter.
Tarakji tapu aika lir. Ali shih tarak dang masü, saka taküm nung tesüiba nung ajangshiba tarak tamajung bener alir. Asenoki itemji nembangtsü meranger. Saka nembangtsü merangba jagi taküm nung tepela angur masü, saka tejashi tali bendenlokerba dang. Saka kechi taküm nung taraktemsa ali itemji temulung atoker kar den lemsateptetra aji na asoshi taneptsü anguba mapang ka asütsü.
Yisu-ia pa tarak nütsüngtem dang sayutsü marendaki liasü. Latin oshi nung Yisu tarak dangji stigmata ta ajar, koba English nung stigma (maksü/tarak) ta amshir aji stigmata nungi aruba lir. Iba tarak khenbo maksü maksü ama bilem, saka tangbo aji osang tajung aküm. Koba tarak südir süang tarak jagi noksa tajung akümtsü Yisu dak tashi lir. Isaia 6:13 nung aut melen narozük (beauty for ashes) kümtsütsü tenangzüka lir. Ne tarak kar asoshibo teimla otsü tajung asütsü.
SARASADEM
Kibuba Yisu ne tarak ama nia taküm nung tarak kar. Iba tarak agi nüchi aser tekümtet otsü tasen akümtsü nai ni yariang. Amen

Pope dang nangzükbama Iraq nunger lenirtemi inyaksü imlar: Younan


March 20, 2021: Tawa Pope Francis-i Iraq semdangba mapang nung linük nung lenirtemi o tajung aika jembiogo aser aika nangzükgogo, ajisüaka linük nung aliba Khristantemi lenirtemi jembiba aser nangzükbama amaji inyaksü asü meinyaksü, ta bilema sarasademdar, ta Syriac Catholic Patriarch, Ignace Joseph III Younan-i metetdaksü. Beirut nung osangbener den jembidang Khristan lenir, Younan-i, "O agi dang masü saka mapa agia Khristantemji kasa sensotem ama züngshitsüla. Tang tashi nungbo Iraq nung Khristanem densema minorities tem bendanga züngshiba ozüngtem lir," ta metetdaksü.
2003 küm tashi nung Iraq nung Khristan nütsüng million 1.5 liasü saka 2003 küm US leniba nung sepaitem linüki aruba aser 2014 küm nungi Islamic State kiralongrar teloki Ninevah Plain agiba sülenbo linük nung Khristan nütsüng 200,000 (lakh 2) dang kümogo, ta pai metetdaksü.
"Iba ya (Khristan nütsüng lakh 2 majung) atangji aser iba nungji Syriac Catholic Khristan nütsüng shilem 25 den tajemba lir," ta pai ashi.
"Iraq nung Khristanem mapang talangka nungi kanga timtema arur, aser Khristanem anema inyakba den Khristan nütsüng aikati linük toktsür aoba ya kanga majung," ta pai ashi.
Younan-i, "Pope Francis-i Iraq nung anünga alirtem dang yimjung, teimla aser tepela osang

sangoktsüogo. Ajisüaka asenoki shisadangtsü kaji- Iraq nunger Khristanem kwikati linük nung pei kidangi tanaben meyipa aotsü?" ta pai asüngdang.
"Iraq nunger Khristantemi pei kidangi meyipa aotsü asü?. Kechiyong tang tashi Iraq nung tensa junga mali. Tang tashi lendong lir," ta pai ashi.
"Muslim nütsüng timba aliba Iraq linük tiyongtsü nung Pope-i Khrista osangtajung proktsüogo, ibaji ajanga kechi ataloktsü? Ibaji Tsüngrem melung süang, aser onokia maneni teimla nung sarasadema ochi osang proktsü," ta paisa metetdaksü.
Taküm March 5-7 anogotem nung Pope Francis-i Iraq semdangba mapang nung pai sorkar ketdangsertem aser nüburtem dang, tesünep aser terenlok alitsü atema linük nung senso ajak kasa züngshitsüla, aser yimchi-yimjung ajungkettsütsü atema maneni inyaksüla, ta ayongzüka liasü.
Tesüiba küm 20 tsüngda IS kiralongrartemi tepsetba asürtem nem akhüm agüja Pope-i, asenoki Tsüngrem ka dak amanger, iba tetezü asenok ajak atema Tebuji Pa lir, iba tetezü asenok ajak ya adianu lir, ta ashiba den külemi linük nung yimtenten aser loktiliba ajak asentenshitsü aser yangershitsü atema ayongzüka liasü.

LATTER RAIN REVIVAL TELOKI MANENI SARASADEMTSU AYONGER: T.KEN. 18 & 19.

Yakum 2020 kum alima tetsubutsu wara tesashi agi meimchirtem longpanger tepsetyonga aoba to koda tulu liasu. Aser asenokia item to angudang aser angashidang koda ratamata agi sunger ali, hao, asenoki tematiba Tsungrem Yisu khrista dak jenok aser maneni Pa dang nuksu yima sarasadema arudagi yamaji asen Naga lima nung aser alima miemchirtem madak Pa takok aser tesunep agutsuogo anungji asentenshia Pa nem tenungsang agutsutsu mapangji tang lir.
SARASADEM ONUKTEM:-
1. Tsungremi wara tesashi nungi kumzuka ayuba atema tenungsang agustudi
2. Asenok sarasadem langzuba atema tenungsang agutsudi.
3. Sarasadem ajanga asenok longjema kumdaaktsuba atema tenungsang agutsudi.
4. Ano Pai asenok kumzuka ayutsu, iba atema tenungsang agutsudi.
5. Asenokia Pa atema kechi inyaksu mangdang meshia sarasademdi.
**Tayonger tenung nung
Rev. Kari Longchar
Rev. C. Teyong Kichu.**

OLONG PAITEP # 5759



TIPIEN

1. Nisung jenti
4. Tsük rudenba
6. Temzüng tesashi
8. S _ _ i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

OLONG PAITEP # 5758 TELANGZÜBA

TIPIEN :

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

Happy Birthday

TENÜNG : RONGSENRENLA IMSONG

Tasoba anogo : 21 March 2011
 Küm : 10
 Talidak : Mendenti Ward , Tuli
 School : DBS Tuli
 Class : 5

Jala Rongsenrenla küm 10 tashi anema aliba arishi moatsünung Tsüngrem tenüng asanger. Ano maneni la nem takok aser tepela den arishi talang moajangma ta sarasademtsür. Tepela tasoba anogo!

-Temeim Oja, Oba, Tir & Baby Ochi.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jella e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng
2. Tasoba anogo
3. Küm
4. Class
5. School
6. Talidak
7. Salem osang



TANÜBO NAI LANGZÜANG

Q. Nisung temang nung 'Mercury' atsüngdenba ajanga _____ tashidak adoker.

- A. Minamata disease B. Itai Itai
 C. Anemia D. Black foot disease

===== (Taruba adok nung onoki langzütsü)

YASHI ADOK TELANGZÜBA : All the above

AO OSHI ANGAZÜKDAK:

TANÜ ANGAZÜKTSÜBA OJANG

Chigu

(v.) Tzü agi temang ajunga shitok (bath)

• Mapa inyakertemi nikongdang shia tzü chigu.

Mit

(v.) Tzü agi tetsüng, teben shitokba

(washing of legs and hands)

• Pa mapa nungi arur tamasa tetsüng teben mit.



Tir Yimyim

NAI-A YA METETTER MA?

MARCH 21 NÜ ASOR TONGTIBANG NISUNG KAR:

- Composer Johann Sebastian Bach (1685)
- Mexican revolutionary & president Benito Juarez (1806)
- Theatrical impresario Florenz Ziegfeld (1867)
- British theatrical director Peter Brook (1925)
- Actor Al Freeman Jr. (1934)
- Actor Timothy Dalton (1946)
- Musician Eddie Money (1949)
- Actor Gary Oldman (1958)
- Actor Matthew Broderick (1962)
- Actor Rosie O'Donnell (1962)
- Singer Michale Graves - The Misfits (1975)
- Actor Sonequa Martin-Green (1985)
- Actor Scott Eastwood (1986)
- Rapper Diggy Simmons (1995)
- Actor Forrest Wheeler (2004)
- Actress Rani Mukerji (1978)



Rani Mukerji

SUDOKU # 5801

2	6	1				4	9	6	9	4	1	3	5	2	8	7
7			3	1	2	6		5	3	7	4	8	2	1	6	9
	3			6		1	7	1	2	8	7	9	6	5	4	3
1		3	5			6	8		8	6	5	2	4	3	7	9
		9						4	7	2	6	1	9	8	3	5
			8			9	1	9	1	3	5	7	8	6	2	4
			2			7		7	5	9	8	6	4	3	1	2
				4	9	5	2	3	8	1	9	2	7	4	5	6
3	5	2	1					2	4	6	3	5	1	9	7	8

TELANGZUBA # 5800

OJANG LUTEP # 5346

- ÜKON :
- SETAN :
- JEONMBIYGA :
- TSAOÜ :
- LENMEA :
- ÜKON :
- SAKAJI :
- LANGTAKA :
- AARAS :
- MBJEI :

OJANG LUTEP TELANGZÜBA # 5345

ASENI TANGAR DANGBO TEMEIM MESAYUNER SAKA
 TANGAR NUNGIBO TEMEIM AGINER

TAN HOPTA ATEMA - KOMA SÜLA ?

Q. JCPI teloki akangba ama tangsa tang 1963 küm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zülüok tenzük nunga koma süla ?

Olong 20 shi nung March 26, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.

US Defense Secy. Austin aser Rajnath na leniba nung senden amen



March 20, 2021 nü New Delhi nung Defence Minister, Rajnath Singh aser US Secretary of Defence, Lloyd James Austin III na senden amentsü atema Vigyan Bhawan-i arudang tangokba noksa nung angur.

New Delhi, Metsüremi/ March 20 (Agencies): Honibarnü Union Defence Minister, Rajnath Singh aser United States Defence Secretary, Lloyd Austin na leniba nung ketdangsertemi linük ana tesendaktep dak sendakba nung senden amendang Indo-Pacific region aser kiralongra amokmeren densema onük aika nung o lemtepogo.

US defense secretary, Austin-i anogo asemnü atema India semdanger; pa leniba nung ketdangsertem Hokolbarnü India tonga arua liasü. US tongti ketdangser kati tang India semdangba ya ajanga Joe Biden-i aniba administration-i region nung partners den tesendaktep tajungba yanglunüba temaitsü sayur.

Honibarnü India aser US nati

defense aser security tsütsü amlitepa inyaksü bangjemogo aser item rongnung linük ana sepaitem tsüngda amalitepa inyaksü, osangtsüsang lemsateptsü aser nüngdakba maparen balala nung yariteptsü densema lir.

Austin den senden amenba sülen Defence Minister, Rajnath Singh-i, linük anapronglai Indian military aser US Indo-Pacific Command, Central Command aser Africa Command tsüngda ano taliba amalitepa inyaksü bangjemogo, ta metetdaksü.

Tesülen osangbenertem den jembidang Rajnath-i, "Ni Secretary Austin aser pai aniba telok den senden tajangzük kaa menogo. Alima sabang nung India-US tsüngda akokba tashi longjemmer inyaksü yongyar," ta metetdaksü.

India-US tsüngda

tezüngzüktep balala agia aliba dak sendakba nung Rajnath-i, linük anaprongla tajangzük angutsü atema ketdangsertemi LEMOA (Logistics Exchange Memorandum of Agreement), COMCASA (Communications Compatibility & Security Agreement) aser BECA (Basic Exchange & Cooperation Agreement) tezüngzükteptem tajungtiba mapa kuma inyaksü atema o lemtepa liasü, ta metetdaksü.

Honibarnep Austin-i National War Memorial semdanga India nung taküm tenla agütsürtem nem akhüm agütsü, iba sülen Vigyan Bhavan complex nung sepaitemi pa nem akhüm agüja agizük.

Hokolbarnü Austin-i Ato kilonser, Narendra Modi ajuru aser National Security Advisor, Ajit Doval den-a jembia liasü.

World Happiness report nung India jenjang 139buba nung ang lir

New Delhi, March 20 (Agencies): UN World Happiness Report 2021 nung India linükbo jenjang 139 buba nung ang lir; linük balala nung sensotem pela-a aliba jenjang asadanga ya linük 149 nung asadanga liasü aser taküm agi küm pezü tashi atonga mezüngbuba jenjang nung Finland lir.

Iba report ajanga ashiba agi, India (jenjang 139 buba)nunger sensotem dang nungibo Pakistan nung (jenjang 105), Bangladesh nung (101) aser China (84) nung tepelaba.

UN Sustainable Development Solutions Network-i talisa Covid-

19 wara nung ajemdaker World Happiness Report 2021 ya yanglua liasü.

UN Sustainable Development Solutions Network-i sangdong ka ajanga, "Onok nükjidongji lenla ana nung liasü; mezüngbuba nung covid wara ajanga nüburtem libaliro nung kongshiba, aser tanabubaji alima tesem ajaklen sorkar balalai iba wara anema inyakba jenjang liasü," ta metetdaksü.

"India nunga nisung tsüngdong ajurua asüngdangba den telephone ajanga-a tasüngdangbatem asüngdanga liasü," ta parnoki metetdaksü.

Alima nung tepelatiba

sensotemji Finland lir, iba sülen tanabuba, tasembuba, pezübuba, pongububa, trokbuba, tenetbuba aser tibuba jenjang nung aliba linüktemji Iceland, Denmark, Switzerland, Netherlands, Sweden, Germany aser Norway linüktem lir.

Ano alima nung mepelatiba linüktemji- rara agi kongshia aliba linük- Afghanistan (jenjang 149buba), Zimbabwe (148), Rwanda (147), Botswana (146) aser Lesotho (145) linüktem lir.

Alima nung tepelatiba linüktem tarensen ya Gallup World Poll nung tasüngdangbatem langzüba nung ajemdaker renema liasü.

West Bengal nung küm 50-55 tashi terenlok maliasü: PM Modi

Kharagpur/New Delhi, March 20 (Agencies): West Bengal nung assembly election agitsü mapang ana nung lia Honibarnü Kharagpur nung BJP candidate tem atema nüboyimtsüba sentong ka nung jembidang Ato kilonser, Narendra Modi-i, tesüiba küm 50-55 tashi state nung terenlok maliasü, ta metetdaksü.

BJP moatsütsü atema lokti tulu adenshiba atema ajak dang pelar, ta shia Modi-i, "Nenok tejangraba ajanga- 'takumbo Bengal nung BJP sorkar arutsü' ta ashir," ta metetdaksü.

Hokolbar aonung alima tesem ajungalen WhatsApp, Facebook aser Instagram mapa meinyakba dak sendakba nung pai, "Yasüing minute 50-55 tashi WhatsApp, Facebook aser Instagram mapa meinyaki liasü, aser ibaji ajanga nisung ajak shisabuluogo. Yangi Bengal nunga küm 50-55 tashi terenlok maliasü. Nenoki temelenshi kanga aginübaji ni angateta lir," ta ashi.

Iba assembly election ya chief minister melentsü atema dang masü saka "Sonar Bangla" yangertsü atema lir, ta pai metetdaksü.

Amongnü BJP-i West Bengal election atema party manifesto sayatsü lia Ato kilonseri tang agi tanabenbuba state semdanger.

"Kharagpur region ya mini India amai lir. Yangi nisung temeyoktep aika aser oshi balala

jembir aika lir. Yangi platform talangtiba aliba aser India nung mezüngbuba IIT asüba ya Kharagpur atema nümatangtsü lir," ta pai ashi.

"BJP sorkar aliba state ajak nung Centre aser BJP state sorkartemi nüburtem tenzüker, ajisüaka yangi West Bengal nungbo Didi (Chief Minister Mamata Banerjee) ya terenlok nokdangba jara ka kümogo. Nenoki Didi dak tamang aka, ajisüaka lai nenok ashioksü," ta pai ashi.

Trinamool Congress tongti aser Chief Minister, Mamata maneni aija pai, "Tesüiba kümtem nung Bengal nung pucca ki lakh 33 yanglutsütsü atema Centre sorkari agizüka liasü. Item kiji tang tashi merenem. Item schemes ajanga nüburtem tajangzük ngura nüburtemi Modi moatsütsü ta Didi-i bilemer," ta ashi.

Tan hopta tetenzüklen-a Modi-i West Bengal kübok Purulia district nung nüboyim sentong ka nung jembia liasü. Iba sentong nungi pai, state nung Mamata Banerjee-i aniba Trinamool Congress sorkari ochimashi inyaker aser ozüing alema inyaker, ta aija liasü.

Assembly menden 294 aliba state nung Assembly election March 27 nungi tenzüka shilem ti lemsar agitsü aser May 2 nü vote zünga election osang sangdongtsü.



Ranchi, March 20, 2021: Honibarnü Ranchi nung Jharkhand Assembly Speaker, Rabindra Nath Mahato-i Covid-19 vaccine atudang takok anguba temaitsü sayuba noksa nung angur.

Maharashtra: Chemical factory arongba lendong nung nisung 4 asü

Ratnagiri (Maharashtra), March 20 (Agencies): Honibarnü Maharashtra nung aliba chemical factory ka nung langka apokba sülen mi lendong atalok, aser iba lendong nungji factory nung inyaker pezü asü aser ka yiru, ta police ketdangser kati metetdaksü.

Honibarnep 9:15 ako meta Lote-Parshuram MIDC complex nung aliba Gharda Chemicals Ltd. factory nung mi lendongji komaser tenzükar mejangja, ta paisa metetdaksü.

Iba lendong osang metetdaksüba sülen fire-brigade gari pezü den sepaitem oa mi ensepba den külemi yangji

inyaker aayangertem kümzüksü merang.

Fire department staff tem aser poolice nati senteper yangji inyaker nisung 40 bo kümzüka liasü.

"Telung nungjagi nisung pongu madokteti liasü, aser sepaitemi parnok rongnung kabo kümzükogo. Tesülen nisung pezü rongdoker aliba tasü mang angü," ta Khed Police Station nung ketdangser kati osangbener nem metetdaksü.

Yirua alisangji anameta aliba sorkar hospital kati anir ogo aser tasü mang pezüji post-mortem agitsü atema bener ogo, ta paisa metetdaksü.



March 20, 2021 nü West Midnapore district kübok Kharagpur nung aliba BNR Ground nung BJP candidate tem pusema election nüboyim sentong ka nung jembiba sülen Ato kilonser, Narendra Modi-i lokti dak teka ayiploksüba noksa nung angur.

Pakistan PM Imran Khan dak Covid-19 tashidak potet



Pakistan Ato Kilonser Imran Khan anogo ana tejakdang Covid-19 vaccine agiba noksa nung angur.

Islamabad, Metsüremi/March 20 (Agencies): Pakistan Ato Kilonser Imran Khan dak Honibarnü Covid-19 tashidak potetogo, ta linük health minister Faisal Sultan-i Twitter ajanga sangdongogo. Pa tang kidang lokti nungi pilar temang anepaludar, ta health minister-isa ashi.

Anogo ana tejakdang Covid-19 vaccine agiba sülen tanü Ato Kilonser dak tashidak potetogo. Linük ajunga nung anti-coronavirus vaccination campaign kübok pa vaccine agi koba tang linük ajunga nung benoka inyakdar. "Ato Kilonser Imran Khan nem tanü vaccine agütsüogo. Vaccine agiba anogo pai linük ajunga dang wara asendenshir prokshia aoba mapang SOP benoka inyaksü mepeshia asüngdangogo," ta pa indang office ajanga tweet süa liasü.

Linük aika den Pakistan nunga anogo shia Covid-19 tashidak menar tali küma odar.

Pakistan nung Honibarnü nisung 3,876 dak tashidak poteta taküm küm anogo ka nung nisung timba dak coronavirus tashidak potetogo aser linük nung positivity rate 9.4 jungogo.

Linük nung tang tashi nung nisung 623,135 dak tashidak potetogo aser taoba ghonda 24 tsünga nisung 40 asüba sülen tashidak agi asür 13,799 jungogo.

Data ajangsa tang tashi nung nisung 579,760 anepba sayuogo ajisüaka ano nisung 2,122 temang kanga mejungi lir.

Bloc nem mezümg magütsüra AstraZeneca exports nokdangtsü akok: EU tekolakba

Munich, Metsüremi/March 20 (Agencies): EU tekolakba Ursula von der Leyen-i Honibarnü, bloc nem vaccine mezümg magütsüra AstraZeneca vaccines tangaleni belener aoba nokdangtsü amokmerenogo. Vaccine menoa magütsüba ajanga alima ajunga shisabulu nung aliba mapang tang iba olen lemsatepogo.

"Vaccine bener aoba nokdangtsü akok. Iba ya AstraZeneca dangi osang ka lir: nenoki tanga linüktemi yok metenzük tsünga Europe nung tenangzüktepba yanglur aliba tama ataloktsütsüla," ta von der Leyen-i Germany Funke media group den sensaksemba mapang ashi.

Covid-19 vaccine agütsüba sentong takaraba nung benoka inyaksü atema European Union kangshia aliba mapang iba amokmeren agütsüogo. EU züngsem linüktem aika nung tashidak tali menatapa aoba ajanga tenokdangba tasen agütsütsüsa kümogo.

Von der Leyen-i ashiba agi, Anglo-Swedish pharma giant AstraZeneca-i, taküm küm mezüngbuba quarter nung

vaccine dose million 90 agütsütsü nangzüka nungi shilem 30 dang agütsür lir.

Company-i EU plant tem nung mozü yangluba atszükba dak tai tongloksüogo, ajisüaka UK nembo tenangzüktepba nung aliba ama vaccine ajunga agütsüba ajanga European ketdangsertem mepelar.

European Commission tir von der Leyen-i, Bodhobarnü Covid-19 vaccines European exports nokdangtsü atema jungdak mapang benokba tashi amshitsü amokmerenogo.

"Lenmangtem ajaka asadangtsü," ta taoba German defence minister-i ashiba den taruba hopta EU lenirtem senden nung vaccine ken o benoka sensak asemtsü ta ashi.

EU-i vaccine belenshiba asadangtsü atema inyakyim ka benokogo aser iba kübok Europe nem vaccine agütsütsü nangzükteper aliba manufacturer temi bloc adena tangaleni vaccine yoktsü sentong lira sangdongtsüla.

Britain nung vaccine agütsüba sentong koba Europe nung tanga linüktem dang nungi kanga agi tekaraba lir, iba ajanga EU linüktem tebilemstü akar.

London-i, parnok vaccine agütsüba sentong takok asoshi vaccine belener aoba tenokdangba agütsüba atema Brussels-i aitsüogo, koba Ato Kilonser Boris Johnson-i aniba sorkari magizük.

Japan anütoktiplen menoknok anak

Tokyo, Metsüremi/March 20 (Agencies): Honibarnü Japan anütoktiplen menoknok anak, aser meter ka talang tsunami dena adokdakja liasü, ta public broadcaster NHK sangdong ka ajanga metetdaksü. Iba tesem nung 2011 küma lendong tulu ataloka liasü.

Menoknok agi Miyagi Prefecture tzüküm 6:26 p.m. (0926 GMT) nung kongshi aser menoknok magnitude 7.2 liasü, ta Japan Meteorological Agency-i ashi.

Tohoku Electric Power Co-i, Onagawa nuclear plant nung inyaksangshi sota lir aser tang plant asadanga mapang lir, ta NHK-i ashi.

Tokyo Electric Power-i ashiba agi, parnok Fukushima

Dai-Ichi power station asadangdar, koba 2011 küm March ita menoknok ajanga kanga mejungi raksaja nuclear tsütsü mepetmesü tulu adok aser iba tesem temeket nung alirtem aika tanga tesemi anintsüsa aküm.

NHK-i, tremor sülen Sendai bureau telung nung tsüngbang nungi sangzüa aliba plaque ka second 30 shi arakzüba fottage ka sayuogo. Parnoki sadem nungi osettsüt tsükba mesera menoknok ajanga teraksatsüba bener arutsüba indang kecha osang magütsü.

Iba menoknok ya epicenter nungi km 400 shi pilar Tokyo tashi nunga ajangshia liasü.

NHK-i, nüburtem dang tzüküm anasai maotsü tekümdangtsü metetdaksüogo.



Britain Ato Kilonser Boris Johnson AstraZeneca vaccine mezüngbuba dose agiba noksa nung angur. Pa London kübok St. Thomas' Hospital nung Clinical Pod Lead, Lily Harrington nung vaccine agia liasü. France Ato Kilonser Jean Castex densema Europe nung lenirtem aika AstraZeneca vaccine agidar.

US den tzümopung aser tanga onük sensak asemtsü: China

Beijing, Metsüremi/March 20 (Agencies): China-i Honibarnü ashiba agi, US den tzümopung aser tanga onüktem sensak asemtsü mulungtepogo. Iba ajanga tawa tembangba sensaksem tejakdangi aoba sayur koba taoba mapangbo alima nung rongsenketsü tulutiba ana ken o balala nung obang mapaba ajangshia aruogo.

Xinhua News Agency sangdong ka ajanga Anchorage, Alaska nungi ashiba agi, China aser U.S. nati tzümopung melenshiba ken o bentettsü atema telok ka tentettsü mulungtepogo aser iba den diplomatic aser consular missions inyakyim nung teyari agütsütsü aser linük ana osangbener dak sendakba nung ken o benoka sensak asemtsü mulungtepogo.

Trump yimsüsüba mapang linük ana tsünga osangbenrtem visas aser consulate dak sendakba nung mangatetep liasü aser tzümopung melenshiba ken o nung linük ana longjemer inyaktettsü ama repringteter.

Biden administration ketdangser aser China nunger ketdangsertem tsünga Alaska nung senden ka mena liasü. Senden ya human rights dak sendakba nung television camera matsüngdang sensaksema tenzük aser iba sülen ki shibanga yur onük

balala sensaksema liasü.

Xinhua sangdong ajanga, tzümopung melenshiba ken o dak sendakba nung linük anapronglai osang agütsüteptsü aser tesendaktep nung inyaksü mulungtepba indang osang agütsüba dak alia climate change working group dak sendakba nung osang tejangja magütsü.

Kasa sangdong ajanga, Covid-19 travel aser visa policy aser parnok indang diplomat tem nem vaccine agütsütsüba indang benoka sensak semogo, ta metetdaksü.

Linük ana tsünga consular missions aser osangbener dak sendakba nung sensaksemogo ajisüaka taoba mapang mangatetep adokba indang meshisem.

U.S.-i taoba küm Houston nung Chinese consulate shibangtsü atema tetuyuba agütsü aser China-ia telangzüba agüja Chengdu yimti nung U.S. consulate shibangtsü atema tetuyuba agüja liasü.

U.S. nung china nunger osangbenertem aser China nung US media atema bendanger osangbenertem nem tang ita asem anenzüker mapa inyaksü atema dang temelaba agütsür lir, aser iba ajanga parnok mapa mejangjai kümdaktsür, ajisüaka parnok item linüktem nung mungzüksü atema temelaba atsülangshia arudar.



Atlanta kübok Emory University nung Georgia indang Asian-American anaserd Pacific Islander community lenirtem den sensaksemba sülen Tir Joe Biden-i o jembiba mapang tangokba noksa nung angur. Noksa nungsa tatong tir Kamala Harris-i angaa ataba angur.



Zunheboto nung World Oral Health Day mungogo

Zunheboto, Metsüremi/ March 20, 2021 (TYO): Honibarnü (20.03.2021), "Be Proud of Your Mouth" omen nung ajemdaker Indian Dental Association Nagaland State Branch (IDANSB), Zunheboto Unit-i Free World Oral Health Day ayonga agiogo. Iba anogomung nüngtem nung Kulhoupu yimdak free dental camp ka ayongzük.

District Hospital, Zunheboto, Dental Surgeon, Dr. Esther Chopphy-i, "Be Proud of Your

Mouth" omen nung ajemdaker dental, oral health aser hygiene indang tongtibangtem metetdaksü.

Tepo anepalua aser teponü tashiita yutsüba ajanga asenok anema aliba den arishi talangba litettsü akok, ta lai ashi.

Iba sentong nung, Dr. Loni Chishi, Dental Surgeon, DH menden liasü aser sentong tenzüka Women Leader, Aotoli Awomi-i sarasadem. Dr. Akaholi V Zhimo-i tepo timi meyuba yimyatem telok dang

sayu. Village Council Chairman Samuel Zhimo-i mapang tatsüka agia o jembi aser Dr. Tohito Kinimi-i tepela anküp o jembi.

Iba medical camp nung nisung 50 tashi ajangzükogo. Kasa mapang camp nung adener ajak nem toothbrush aser mozü balala lema agütsüogo. Iba dental camp ya Dr. Esther Chopphy, Dr. Tohito Kinimi, Dr. Loni I Chishi aser Dr. Akaholi Zhimo nungeri anir agi, ta sangdong ka ajanga metetdaksü.

Noklak nung training centre ka lapoktsüogo

Noklak, Metsüremi/March 20, 2021 (TYO): Beti Bachao Beti Phadhao (BBBP) tawabangba kübok Hokolbarnü (19.03.2021), tom nung school toktsür alir tainlonglong tetsür kaketshirtem atema Noklak nung Vocational & Leadership training centre lapoktsüogo, ta sangdong ka ajanga metetdaksü

Iba centre ajanga tom nung shishaliok reju toktsür alir tainlonglong tetsür kaketshirtem nem vocational training agütsütsü nükjidong yur achaayangtsü.

Iba sentong nung alakteta tejaoker DC, Noklak, Reny Wilfred, IAS-i, iba centre nung training agirtem sü atakba, tsüngsemyangluba, molokatakba, jewellery aser azük yangluba yimyatem sayutsü, kong training agitsü atema shimteta aser register ser alir ajak nem item maparen atema osettem angati agütsütsü. Ita trok atema mezüng shilem nung kaketshir 20 shimtsü aser kaketshirtemi angazükba asadanga telok balala shimtsü, ta metetdaksü.

Takdang peria maliba aser nendaknendaka training agütsütsü nükjidong nung training agirtem tatakzük dang

shimer. Training agir rongnung sempet tajung alirtem Micro credit scheme den tesendaktep yanglutsü aser parnoki yanglutetba osettem ayoktsü asoshi iba training centre ajanga marketing tesem lapoktsütsü, ta pai shisem.

DC-i, parnok timi angazükdaksütsü asoshi, leadership training center nung library facility tem peria agütsütsü, kong kakets, computer aser internet facility angutsü. Anungji, iba centre ajanga tajangzük angutsü asoshi training agitsüpur aser külem sendaktepa alir ajaki bendanga agüja inyaktsüla, ta ayongzük.

SDO (C) Noklak, C.Phuniang-i, district nung tetsürtem rongsenkettsüng tsütsü takok ngua inyakteta aotsü asoshi nükla tulu yur iba center lapoktsür, ta ashi.

Iba project tenzüksüba atema pai DC dang pelaba metetdaksü aser iba centre takok ngua achaayangtsüsa senotsü peria agütsüba atema pai District Administration Tuensang danga pelaba shisem.

Nükla tulu yur tenzüka ama, iba training nungi tajangzük angutsü atema tesayur

(trainers) aser training agir ajaki khuret bena aser temulung agüja shilem agitsüla, ta pai ajungshia liasü.

Khiamniungan Tribal Council President, M.Thango-i, tom nungi school toktsür alir tainlonglong tetsür kaketshirtem pei taküm jenjang tajungba yanglutsü asoshi iba training center lapoktsüba ya maongka tuluka ama agizüktsüla, ta ashi.

Training mapang tesayubatem tenoktenoka angazüktsü aser angazüktsü asoshi tejangraba alitsü asoshi training agitsüpur tem pai ayongzük. Noklak tesem district jenjang ngur sülen nungi nübурtem nem tagütsütsü tim agüja aser terenlok maparen balala bener arutsüba asoshi pai DC Noklak aser District Administration dang kangasa pelaba shisem.

Kasa sentong nung EAC, Noklak, Yithachu Thur, EAC Panso, Changsang Soted aser President, Khiamniungan Menyiu Hoikam, Newkhai nungeri jembiogo. Iba sentong nung District Development Promoter, Chongkoi menden liasü, ta sangdong ajanga metetdaksü.

Lava-i Magnum XL, Aura aser Ivory Tablet saya



New Delhi, Metsüremi/ March 20, 2021 (Agencies): India indang tech company Lava-i parnok indang e-Education series kübok Lava Magnum XL, Lava Aura aser Lava Ivory ta nüngja agütsüba tablet asem sayaogo. Item tablet asem nung angati course agütsütsü nükjidong nung company-i e-learning platform EduSaksham den longjemogo.

Tablet asempronlga ya kaketshirtem angazüktsü asoshi device tetemjen lir aser item tablet ya Flipkart ajanga angutsü.

Imlaa ataba ama, Lava Magnum XL, Lava Aura aser Lava Ivory nung display tasazük balala angutsü. Lava tablet asempronlga display nung bezels ji apua apua alitsü. Item tablet ya 'sale deal' talisa HDFC Bank credit card aser Bank of Baroda Mastercard debit card (first-time transaction) ajanga 10 percent discount nung agütsütsü terenemba lir. Kasa mapang, Flipkart Axis Bank credit card customer temi 5 percent instant cashback angutsü.

Lava Magnum XL nung 10.1-inch IPS LCD display den 390 nits brightness inoka yanglutsüogo. Iba tablet tejaklen 2-megapixel front camera aser tesülen 5-megapixel camera angutsü. Magnum XL nung quad-core Mediatek processor angutsü, koba 2.0GHz alitsü aser 32GB internal storage angutsü, koba 256GB aser 2GB RAM tashi atsülanga

amshitettsü.

Magnum XL nung battery tasazük 6,100mAh alitsü aser Android 10 out of the box ajanga achaayangtsür. Tanga feature tsütsü reprangdangra, iba device nung 4G VoLTE (dual-SIM), dual-band Wi-Fi, Bluetooth v5.0, 3.5mm audio jack, OTG support aser tanga aika angutsü. Iba den külemi pre-installed apps talisa Google Play Store, Gmail Go, Youtube Go, Google Go, Google Assistant Go, Maps Go, Files Go aser Facebook dena lir. India nung iba tablet jenjang sen 11,999 alitsü.

Lava Aura nung 8-inch display aser 32GB onboard storage angutsü, koba 256GB tashi atsülanga amshitettsü. Iba tablet nung agüja aliba battery tasazük ji 5,100mAh alitsü aser quad-core Mediatek processor - 2.0GHz angutsü. Lava Aura tesülen 8-megapixel rear camera aser 5-megapixel front camera inoka yanglutsüogo.

Tanga specification tsütsü reprangdangra, Lava Magnum XL ama Aura nunga angutsü aser iba tablet jenjang sen 9,999 alitsü.

Lava Ivory nung screen tasazük tilaba - inch 7 angutsü aser 16GB internal storage inokja lir, koba 256GB tashi atsülanga amshitettsü. Iba Android tablet tesülen 5-megapixel camera aser tejaklen 2-megapixel selfie camera angutsü. Lava Ivory jenjang sen 7,399 alitsü.

NE nung mezüngbuba Olive Planet dokan Dimapur nung lapokogo



Dimapur, March 20 (TYO): Honibarnü Northeast nung mezüngbuba Olive Planet indang dokan ka Dimapur nung lapokogo.

Iba dokan ya Kashiram, Rangapahar Road nung lapoka lir aser tanü DABA Asso. Pastor, Rev. Lima Jamir-i meshiteta sarasademtsüogo.

Olive Planet retail store kiburji Naga nunger entrepreneur Wb. Tulu Lkr lir aser pai ashiba agi, Northeast India nung Olive Planet indang mezüngbuba franchise ji pai bener arua lapoker.

Iba dokan meshiteta lapokba sentong nung Kashiram Village Council Chairman den züngsem ka aden aser tenaprongi Kashiram nung iba ama dokan tajung lapokba atema pelaba den tarutsü nunga yaritepa aotsü metetdaksü.

Olive Planet ya India nung mezüngbuba Premium Military Brand lir aser iba company ajanga Military, Adventure, aser Outdoor Gear tapu balala ayoker.

Olive Planet retail store ya House No. 87, Rangapahar Road, Kashiram nung lir.



Dimapur, Metsüremi/March 20, 2021: Hokolbar (19.03.2021) aser Honibar (20.03.2021) anogo Nagaland House, Kolkata nung Horticulture Department, Nagaland aser Nagaland House, Kolkata ajanga süngjanglijang aser süngolemba sales day ayonga agiogo. Iba sale sentong nung Nagaland nungi tsünütetba süngjanglijang aser süngolemba tem ayoktsü asoshi sayaa liasü. Sale tenzüka mezüng anogo nung süngjanglijang aser süngolemba shilem 60 tashi yoktetogo, ta sangdong ka ajanga metetdaksü.

2nd Mkg Inter-WardFootball Tournament Artang Ward-i benogo



2nd Mokochung Inter-ward football tournament takoker team Artang Ward pur senpet agizüker pelatepba mapang tangokba noksa nung angur. Mokochung, March 20, 2021

Mokochung, March 20 (TYO): March 9 nungi tenzüka yangi Imkongmeren Sports Complex nung 2nd Mokochung Inter-ward Football Tournament asaya arur, March 20 nü final match Artang Ward o Penli Ward na asayaba, Artang-i goal 3-1 agi koka taküm iba asayamung marok parnoki benogo.

Artang Ward-i goal asemprongji mezüing asaya tesadang (1st half) nung dang idaktsü. Mezüing goal ji Artang nungi striker Jersey No. 9 –

Temshi Imchen-i minute 25 nung yok aser tanabuba aser tasembuba goal ji Artang nungi Jersey No. 37 – Ampangchubai minute 27 aser 29 nung goal kaka agütsü.

Tanabuba asaya tesadang asayaba mapang Artang player kati D-Box telung nung penalty ka menasa aser iba penalty ji Penli Ward nungi captain – Imlitangit-i metsü aser Artang keeper-i ibaji mepushi yok.

Takoker champion team nem senpet trophy den kuli kakat aser sen 50,000/- (rupees

fifty thousand) aser tanabuba runner up nema kuli kakat den sen 30,000/- (rupees thirty thousand) agütsü.

Juri senpet (individual prize) agizükertem; Highest Scorer – Jersey No. 7 : Imnatoshi (Mongsenbai Ward, 8 goals), Best Defender – Jersey No. 3 : Limaküzmük Jamir (Penli Ward), Best Midfield – Jersey No. 17 : Moa Imchen (Artang Ward) aser Player of the Tournament – Jersey No. 7 : Imlitangit (Penli Ward).

Artang Ward ya 2019 küm mezüing Mokochung Inter-ward football tournament nunga final tashi atu saka parnoki Arkong Ward pur mekoki runner up dang ajangzük. Aji saka, taküm Arkong o Artang na semi final nung ajuruteper aser Artang pur atema iba match ji mangyangba match ka mesüka liasü aser parnoki Arkong pur goal 2-0 agi tsükdakja final tongteta liasü.

Asayamung shibangba aser senpet agütsüba sentong nung Department of Land resources Mokochung, District Project Officer, Dr. Sashiyangba tetushi tesemdang liasü.

4buba Kohima Super League April 21 nungi tenzüksü

Kohima, Metsüremi/March 20, 2021 (TYO): I.G Stadium, Kohima nung April 21 nungi May 8, 2021 tashi 4buba Kohima Super League 2021 ayonga asayatsü, ta sangdong ka ajanga metetdaksü.

Lisapur tsüingda football asayatsü sempet alir asayar tasen nem sabang ka agütsütsü aser football temaba jenjangi ajungkettsütsü nükjidong yur iba league ya Kohima Town Club (KTC) ajanga ayongzük.

Honibarnü, sangdong ka ajanga Kohima Town Club (KTC)-i, iba League nung shilem agütsü asoshi

jangra alir club temi April 05, 2021 matongdang asayamung ayonger committee züingsem tem den tongtepratepsüla. 4buba Kohima Super League nung senpet sen ajak sentepa sen lakh 5 dak tema alitsü, ta metetdaksü.

Anungji, iba League dak sendakba nung osang tejangja metetpelatsü atema tejangrar club temi Kethozelie Liezietsu - 7005537505 (Convenor, Organising Committee) aser Azho Sophie-9436800769 (Co-convenor, Organising Committee) na den tongtepratepsü akok, ta kasa sangdong nung shia lir.

ISSF World Cup: Tebur 10m Air Rifle nung Panwar-i Bronze medal angu

New Delhi, Metsüremi/March 20, 2021 (Agencies): Honibarnü, ISSF World Cup-tebur 10m Air Rifle tetoktepba nung India nung Divyansh Singh Panwar-i on the bronze medal takok angu.

Tang, New Delhi kübok Dr Karni Singh Shooting Range nung asaya aliba asayamung indang 10m Air Rifle final ya mezüing medal round asaya liasü, kong India nung shooter Divyansh aser Arjun Babuta naprongla iba asaya atema qualify asü. Ajisüaka, final tetoktepba nung, World No.1 Divyansh Panwar-i tasembuba jenjang tongteta India atema bronze medal takok angu.

Iba asayamung final nung, külem India nung Babuta-i jenjang pungobuba ang tongteta tembang.

Kasa tetoktepba nung America nung shooter Lucas Kozeniesky-i point 249.8 tongteta gold medal takok angu; kasa mapang Hungary nung Istvan Peni-i point 249.7 tongteta silver medal ajangzüket.

India atema bronze medal takok angutsü mechi Divyansh-i Sergey Richter ajateta asaya. Iba final asaya nung arishi küm 18 tain India nung Divyansh-i point 228.1 ngutet aser külem India nung Arjun Babuta-i point 185.5 dang angu.

Tebur 10m Air Rifle asaya nungi Babuta tsükba sülen, India team-i medal angutsü teimla ajak samadok aser iba mapang point .03 agi Ritcher tesülen Divyansh jenjang pezübuba nung liasü.

Ajisüaka, asaya aoba mapang Israel nung Ritcher-i point 10 tekübok anguba ajanga Divyansh pa tejakdang kümadok. Richter-i 10.7 angu saka Divyansh shot 10.3 aliba ajanga pa tejakdang kümadok aser medal round nung asayatsü maongka ngutet.

Hokolbarnü, qualification

round asayaba mapang, 2016 ISSF junior world cup bronze medal angusang Babuta-i 631.8 ngua külem asayar Divyansh tejakdang liasü. Iba round nung Babuta jenjang tasembuba aser Divyansh-i point 629.1 ngua jenjang trokbuba nung tembang.

Ano külen, kasa round nung India nung Deepak Kumar-i point 626.4 dang ngua jenjang 12buba tongtet.

2019 küm April ita Beijing World Cup asayaba mapang, 10m air rifle nung Divyansh-i silver medal takok anguba sülen pai Olympic quota ajangzüket.

*Shooter asem dak COVID-19 putet

New Delhi nung tang asaya aliba ISSF World Cup asayamung nung shooter asem dak coronavirus tashidak aliba tejangja putetogo, ta Honibarnü National Rifle Association of India (NRAI) sangdong ka ajanga metetdaksü.

Tang shooter asemprongla team hotel nung quarantine süa mungdar. Iba hotel indang takdang nung par asemprongla den külemi amunger ajak Covid-19 test agiba sülen, parnoka quarantine süa mungdar. Parnok indang Covid-19 osang atadar.

Otongdar sangdong ka ajanga angazükba agi, tang Covid-19 tashidak puteta alir asem rongnung shooter anabo India contingent nungi lir. Iba asayamung atema athlete tem tonga aruba mapang nungi par asem densema shilem agi shooter pezü dak iba tashidak puteter alitsü.

Shooter asem dak iba tesashi wara aliba meputetdang, Brehostibarnü, ranking temaba jenjang nung alir international shooter ka dak COVID-19 tashidak putet aser iba osang angazükli dang shooter ya mozüki anir oa anepalu.

Miami Open nungi Djokovic tukuogo

New Delhi, Metsüremi/March 20, 2021 (Agencies): Tawa, Roger Federer, Dominic Thiem aser Rafael Nadal nung Miami Open nungi tukadokba sülen, Novak Djokovic-a iba asayamung nung shilem magitsü telemtetba agiogo.

Aruya aliba hopta nungi tenzüksü aliba ATP 1000 Masters asayamung nungi tukadoker, ta Djokovic-i metetdaksü.

Miami Open ya hard-court asayamung ka lir, kong Serbia nung World No.1 Djokovic-i Andre Agassi ama 2007 nungi 2017 küm tashi trokben tashi iba asayamung takok nguogo.

Taoba ita Australian Open asayamung nung Djokovic yirua liasü aser April ita ATP tour nung tanaben shilem agir ama pai Monte Carlo Masters

nung asayatsü terenemba lir. Arishi küm 33 tain Djokovic-i mapang agia par kibong den külemi amungtsü tebilemba nung Miami Open asayamung nung masayatsü lemtet. Miami Open ya March 22 nungi April 4, 2021 tashi asayatsü.

"Taküm Maimi Open asayamung nung shilem magitetsü aser iba osang atema fans temi kü dang taidokangma," ta twitter ajanga Djokovic-i lemsatet.

"Kinungtsü aser chirnur den külemi amungtsü asoshi iba asayamung nung shilem magitsü lemtet. Kidang süshia mesüra tour atema ni mapang agütsütsüla. Taruba küm ang iba asayamung nung shilem agitsü sentong lir," ta pai shisem.

Djokovic yiruaka, taoba ita Melbourne Park nung pai

Grand Slam title 18buba takok angu aser hopta aika tebur top ranking temba jenjang nungi marakzüi/atsüingzüka melui aruba ajanga March 08, 2021 nü pai Roger Federer indang record ajangtet. Iba anogo top 1 asayar ama Djokovic hopta 311buba abensaa liasü.

Maneni, anogo ka lir tenzüksü aliba Maimi Open nung Thiem, Federer aser Nadal nung shilem magitsü osang jangjatsüba mapang, Russia nung World no.2 Daniil Medvedev-i iba ATP Masters asayamung nung asayatsü terenemba lir. Taoba mapang iba asayamung takok angur Andy Murray-a iba asayamung ayongertemi 'wildcard entry' agütsüba sülen Miami Open nung pai shilem agitsü ta osang jangjatsü.

Tokyo Games atema Manika o Sharath na qualify süogo

Doha, Metsüremi/March 20, 2021 (Agencies): Honibarnü, Doha nung Asian Olympic qualifier - temeyoktep tarep final tetoktepba nung India nung Achantha Sharath Kamal aser Manika Batra nati top seed Korea nung temeyoktep tarep Sang-Su Lee aser Jihee Jeon madak takok nguogo.

Iba asaya akokba den külemi, Tokyo Olympics - mixed doubles table tennis asayamung atema asayar anaprongla temsüa kümogo.

Tang asaya aliba Asian qualification asayamung nung temeyoktep tarep atema quota ka anünga lia Sharath Kamal aser Manika Batra nati iba quota ajangzüketatsü atema meranga asaya aruogo. Iba asaya tenzükli mezüing game ana nung 8-11, 6-11 agi tena tamakok ngua liasü.

Ajisüaka, tanüingba game pezü nung tenati 11-5, 11-6, 13-11, 11-8 agi akokba sülen too seed nung alir Korea nung temeyoktep tarep 4-2 agi tsükdaksü. Iba final asaya nung Sharath aser

Manika na Tokyo Olympics table tennis temeyoktep tarep atema qualify asütsüsa point tenet tashi atonga mangudang tena 4-8 agi Sang-Su Lee aser Jihee Jeon tesülen liasü.

Tan hopta tetenzüklen, Sharath Kamal aser Manika Batra na kija asaya nunga takok ngua Tokyo Olympics atema single berth ajangzüketetogo. Kasa asayamung nung India nung top rank paddler G Sathiyar aser Sutirtha Mukherjee nati pei tata asaya koka singles quota nguogo.

BILEMDANGANG

"Tesüiba tashimaitlen masü tarutsülen tesangwa nung aka soangma."